

Inilalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG
PANGMASANG
PAHAYAGAN
NG BIKOL

Espesyal na Isyu
Hulyo 5, 2002

Pambansang Kalagayan:
**Ibayong Pagbulusok ng Krisis
sa Ekonomya at Pulitika,
Hudyat ng Pagbagsak ng
Rehimeng US-Macapagal-Arroyo**



Niyayanig ngayon ang administrasyon ni Macapagal-Arroyo ng mga nagsasalimbayang krisis sa ekonomya at pulitika.

Umiigting ang mga protesta ng mamamayan dahil sa labis na pagdarahop at tuluy-tuloy na pagdausdos ng kanilang kabuhayan. Dagdag pa rito ang walang kaparis na disgusto ng mamamayan dahil sa pagkakasangkot ni Macapagal-Arroyo sa malalaking kaso ng korapsyon.

Inilalathala ng Partido Komunista ng Pilipinas-Bagong Hukbong Bayan sa Rehiyong Bikol

Habang patuloy itong nangungunyapit sa pwesto, lalong tumitindi ang bitak sa hanay ng naghaharing uri, at wala ring humpay ang pananabotahe ng reaksyunaryong paksyon ng oposisyon upang maagaw sa kanya ang kapangyarihan.

Sa gitna ng lahat nang ito, nagpapakasapat naman si Macapagal-Arroyo sa paggamit ng pasismo sa mamamayan at pagpapakatuta sa imperyalismo upang makapanatili sa pwesto.



Buong kayabangang ipinagmamalaki ni Macapagal-Arroyo ang kasinungalingang malusog ang ekonomya ng bansa at nakabangon daw ito sa mga krisis nitong nakaraang taon.


Sa kabila ito ng katotohanang may panibagong pagbulusok ng krisis sa ekonomya na higit na nagdudulot ng panibagong pananalanta sa kabuhayan at kagalingan ng mamamayan.

Patuloy na nakatali ang malapyudal na ekonomya sa dikta ng imperyalistang US. Dahil sa paghina ng pamilihang US, bumaba ang eksport ng Pilipinas ng halos 15 porsyento mula Enero hanggang Nobyembre 2001, naging \$29 bilyon na lamang mula sa \$35 bilyon. Sa parehong panahon din, bumaba ng 26.2 porsyento ang ekport ng elektroniks.

Umaalma na ang kalakhan ng mamamayan dahil sa pahirap ng patuloy na pagtaas ng mga presyo ng bilihin. Hindi na kayang manahimik ng naghihirap na sambayanang Pilipino sa harap ng matinding pagdarahop. Kumakalam ang sikhura ng mamamayan at umaabot na sa 1.5 milyong kabataang Pilipino ang lugmok sa malnutrisyon.

Ang hagupit ng globalisasyon ay mas matinding lumalatay sa nakaratay nang ekonomya. Papatindi ang pananalasa ng dayuhang kapital sa lokal na pamumuhunang pang-industriya at pampinansya. Nalantad na ang pandarambong sa mamamayan ng pagsingil ng Purchased Power Adjustment (PPA) ngunit walang balak ang rehimen ni Macapagal-Arroyo na ipahinto ito. Ang batayang serbisyong suplay ng kuryente at tubig ay nakalaang humakot ng limpak na tubo para sa dayuhan. Pinapabwelo nito ang National Power Corporation (Napocor), Manila Electric Company (Meralco) at mga banyagang independent power producers na mangurakot sa mamamayan sa pamamagitan ng napakataas na singil sa kuryente. Balak lamang nitong palitan ang terminong PPA na kinasusuklam na ng mamamayan. Isusunod na rin ang tubig at telekomunikasyon sa papatawan ng PPA.

Patuloy ding tumataas ang tantos ng disempleyo. Sa pagpasok pa lamang ng unang dalawang buwan ng 2002, may 6,500 nang manggagawang natanggal mula sa 70 empresang nagsara. Ayon mismo sa Kagawaran sa Paggawa,



umaabot sa 500 kumpanya ang may notisya ng pagsasara at may 8,000 pang manggagawang nanganganib na mawalan ng trabaho. Dagdag pa dito, sinasagkaan ng malaganap na iskemang kontraktwalisasyon ang demokratikong karapatan ng mga manggagawang mag-union at ipaglaban ang kanilang mga demokratikong interes.

Hindi pa umabot sa 40 porsyento ng gastusin ang kita ng mga manggagawa. Higit na malaki ang suliranin dito sa rehiyon dahil ang natatanggap ng manggagawang Bikolano ay mas mababa pa sa minimum na siyang madalas na kaso sa mga maliliit na kumpanya at mga negosyong petiburgesya. Ang kahilingan ng mga manggagawang P125 dagdag sa arawang sahod, na kung tutuusin ay kapos pa sa batayang pang-araw-araw na pangangailangan, ay tinugon ng baryang limos na P30 ni GMA.

Higit na masaklap ang kalagayan sa pamumuhay ng mga nasa kanayunan at nasa sektor ng agrikultura. Patuloy na bumabagsak ang presyo ng mga produkto ng mga magsasaka. Lampas limang taon nang mababa sa P10 ang presyo ng bawat kilo ng kopra. Samantala, patuloy naman ang pagtaas ng presyo ng mga abono, pestisidyo, binhi, gamot sa hayop at feeds. Wala itong kakayahang makipagsabayan sa mga imported na produktong agrikultural na dumadagsa sa pamilihan.



laganap na kawalan ng trabaho	BILANG
Nawawalan ng trabaho araw-araw	369
Manggagawang Natanggal sa trabaho (Nob 2001)	123,417
Manggagawang nasa Job rotations	29,586
Manggagawang nakararanas ng kakulangan sa trabaho	14,000,000
OFWs na lumabas ng bansa sa unang 10 buwan ng 2001	748,984

Ang genetically modified organisms (GMO) ang siyang pinagtutulakan ng rehimeng US-Macapagal-Arroyo bilang kasagutan sa mababang ani ng mga magsasaka at sa kakulangan ng pagkain sa bansa. Lason itong pilit na isinusubo, hindi lamang sa mga magsasaka, kundi sa buong sambayanan.

Walang ibang ipinagmayabang si Macapagal-Arroyo kundi ang pagpapataas diumano sa pensyon ng mga magniniyog mula P5,000 tungong P10,000. Kung tutuusin barya lamang itong inililimos ni Macapagal-Arroyo mula sa pondong coco levy na pagmamay-ari naman talaga ng maliliit na magniniyog.

ARAWANG GASTOS TUMAAS PAGKALUKLOK NI ARROYO SA PODER

ARAWANG GASTOS (DAILY COST OF LIVING)
PARA SA PAMILYANG MAY ANIM NA MIYEMBRO
(Enero 2001- Agosto 2001)

	Enero 2001	Agosto 2001	Porsyento ng pagtaas
Pilipinas	417.60	427.32	9.72
NCR	500.15	513.98	13.83
Sa labas ng NCR-agrikultural	382.63	391.30	8.67
Sa labas ng NCR-di-agrikultural	402.57	411.69	9.12

Umabot sa P147.02 bilyon ang kakapusan sa badyet ng gubyrno noong nakaraang taon. Kaya bumaling ito sa malakihang dayuhang pangungutang, na umaabot na sa P1.13 trilyon noong Oktubre. Sa unang kwarto pa lamang ng taong 2002 ay P82.96 bilyon na kaagad ang kakapusan sa badyet ng gubyrno. At umaabot na sa P204.3 bilyon o lampas sa sangkapat (1/4) ng kabuuang badyet ang napupunta sa pagbabayad ng interes pa lamang ng utang panlabas.

Sa pagbisita ni Macapagal-Arroyo sa US, inanunsyo ni Bush ang pangakong tulong pang-ekonomiya na \$4.6 bilyon, kabilang na dito ang \$92.2 milyong ayudang militar. Ang World Bank naman ay muling magpapautang hanggang \$1.7 bilyon sa loob ng susunod na tatlong taon upang diumano pasiglahin at maituluy-tuloy ang mga pagsisikap upang maibangon ang ekonomya ng bansa.

Patunay ang malubhang kalagayang pang-ekonomya na hindi tatanggihan ni Macapagal-Arroyo ang alok na ito ni Bush kapalit ng muling pagsuko ng soberanya at teritoryal na integridad ng bansa sa panibagong panghihimasok militar ng US.



Pasismo ang kasagutan ng militaristang rehimeng Macapagal- Arroyo sa mga lehitimong paglaban ng sam b a y a n a n .

Masahol pa sa nakaraan ang hambalos ng kalupitan at pasistang atake ng rehimeng Macapagal-Arroyo sa mamamayang nagpapahayag ng pagtutol at pagtuligsa sa kasakuluyang kalagayan.


Sinikap ng kasalukuyang rehimen, gamit ang reaksiyunaryong Sandatahang Lakas ng Pilipinas (AFP), na supilin ang mamamayan sa pamamagitan ng pananakot, iligal na pang-aaresto at pananabotahe. Naitala din noong Mayo Uno, ang maraming kaso ng pagharang sa mga dadalo sa kilos protesta sa iba't

**Sa Kabikulan,
naitala ang
4,642 kaso ng paglabag
sa karapatang pantao
sa loob lamang ng ilang
buwang panunungkulan ni
Macapagal-Arroyo.**

ibang panig ng bansa. Ngunit naging katawa-tawa at nabigo ang inilunsad nitong "Oplan Tapatan" na dinaluhan ng kakarampot na elemento ng reaksiyunaryong AFP. Layunin daw nitong sabayan ang dambuhalang mga kilos protesta.

Sunud-sunod din ang pananakot, pagdukot, pag-aaresto at maging pagpaslang sa mga lider at kasapi ng mga progresibong organisasyon. Kasabay ito ng sistematikong pulitikal na panunupil laban sa Bagong Alyansang Makabayan (BAYAN), Bayan Muna at iba pang militanteng organisasyon.

Sa Kabikulan, naitala ng KARAPATAN ang 4,642 kaso ng paglabag sa karapatang pantao sa loob lamang ng ilang buwang panunungkulan ni Macapagal-Arroyo.



Tumitindi ang militarisasyon at karahasang militar sa rehiyon. Sa kasalukuyan, nakapakat dito ang apat na batalyon ng Philippine Army (PA), isang Engineering Battalion at isang batalyon ng Regional Special Action Force (RSAF) at Regional Mobile Force (RMF) at may 15 kumpanya ng Philippine National Police Mobile Force (PNP-MF). At dinagdagan pa ito ng isang batalyon ng Philippine Marines na ibinase sa ikatlong distrito ng Camarines Sur. Ang mga ito ang naghahasik ng lagim sa kanayunan at maging sa kalunsuran sa pamamagitan ng mga operasyong militar at psywar sa ilalim ng Oplan Makabayan (OpMak).

Bahagi ng OpMak ang Oplan Balangai na nagkokonsentra sa pagdurog ng mga larangang gerilya at mga konsolidadong baseng gerilya. Patuloy itong nagpapaunlad ng mga pamamaraan sa pag-intel, pag-atake at panlilinlang sa rebolusyonaryong pwersa at mamamayan. Halimbawa nito ang sistemang Force Recon Team o Battalion (FRT o FRB) na nag-iispesyalisa sa pagtukoy ng mga nakahimpil na pwersang gerilya o maging ng makilos na yunit gerilya sa

pamamagitan ng maingat at maliit na grupong kumando na pumapasok sa mga interyor na lugar ng baseng gerilya. Sinundan pa nila ito ng pagbubuo ng Special Intelligence Team (SIT) na may ispesyalisasyon sa pagsalat sa presensya ng armadong pwersa sa pag-aaral ng mga palatandaan sa dinaanang lugar o nahimpilan ng Bagong Hukbong Bayan (BHB). Nagpapanggap din itong yunit ng BHB upang makakuha ng impormasyon sa mamamayan.



Walang kahihyang ibinebenta ni Macapagal-Arroyo ang dignidad ng bansa sa amo nitong imperyalistang US upang masiguro ang suporta sa kanya sa eleksiyong 2004.

Kaya't matapos ang bigong pagdurog sa bandidong Abu Sayyaf, pinipilit pa rin ng tutang si Macapagal-Arroyo na bigyang-matwid ang pagpapatuloy ng anti-nasyunal na Balikatan. Kahit mas nagmumukhang inutil ang AFP, iginigiit ni Macapagal-Arroyo na kailangan nito ang tulong ng armadong tropang US upang tuluyan nang madurog ang napakaliit na grupo ng mga bandido. Mas nalalantad sa mamamayan na panabing lamang ang suliranin sa Abu Sayyaf sa totoong layunin ng mga tropang US. Dahil maglulunsad ng 15 pang Balikatan sa mga lugar na wala namang bandidong grupo.

Kailangang mahigpit na subaybayan ang pagdagsa ng tropang Amerikano sa bansa, malamang may ipapakat na rin sa rehiyon upang tuwirang makapanghimasok sa paglaban sa rebolusyonaryong pwersa, sa tabing ng mga "pagsasanay militar". Sa pagbisita dito ni Macapagal-Arroyo noong Hunyo, ipinahayag niya na ang rehiyong Bikol ay pagsasanayan ng mga susunod na Balikatan .



Ipinahihiwatig ng mga palatandaang pampulitika at ng tumitinding galit ng sambayanan na maaari nang mapatalsik sa kapangyarihan si Macapagal-Arroyo bago pa umabot ang eleksyong 2004.

Dahil sa tumitinding krisis pang-ekonomya, lumiliit ang mapag-aagawang rekurso at kumikitid ang puwang para sa pagbibigayan ng iba't ibang paksyon ng naghaharing uri kaya umiigting ang bangayan at hidwaan sa hanay nila.

Ang pagbitiw ni Bise Presidente Teofisto Guingona bilang Kalihim ng Kagawaran ng Usaping Panlabas ay isang signipikanteng pangyayari. Naninindigan si Guingona laban sa tahasang pang-aalipusta ni Macapagal-Arroyo sa soberanya ng bansa sa pamamagitan ng solong pambabraso nito para igiit ang polisiya sa panibagong panghihimasok militar ng US.

Sa nangyaring "kudeta sa Senado" noong Hunyo, malinaw na pag-agaw ng kontrol sa Senado mula sa namumunong paksyon ni Macapagal-Arroyo ang layunin ng oposisyon. Ang pagbaliktaad ni Senador John Osmena ang nagbigay ng kailangang bilang sa oposisyon upang maging mayorya sa senado. Naibulgar pa ang bigong


planong kudeta ng "Freedom Force" na may l a y u n i n g magtayo ng militar-sibilyang j u n t a . Ipinapakita ng ganitong mga pangyayari ang vulnerable at mabilis na pabagu-bagong h a n a y a n g pampulitika ng m g a reaksyunaryo.



Anumang oras malamang na bumaliktaad ang mga inaasahang alyado ni Macapagal-Arroyo at bawiin ang suporta sa kanyang administrasyon upang sumanib na sa oposisyon.

Sa pagkaganid sa kapangyarihan, abalang-abala ngayon ang mga naghaharing uri sa pag-iipon ng pondo at pagkokonsolida ng makinarya para sa eleksyong 2004. Nagiging mas bulgaran ang pangungurakot ni Macapagal-Arroyo para matapatan kundi man mahigitan ang pondo ng napatalsik na paksyon ni Estrada, pati na rin ang iba pang pangkatin.

Lubos nang nahubaran ng maskara ang rehimeng Macapagal-Arroyo. Nalampasan na niya ang rekord sa pagiging pasista, papet at kurakot na pangulo ng bansa. Nitong huli, garapalan na rin siyang nakikipag-agawan sa kurakot mula sa jueteng. Walang kahihiyan din niyang kinakandili ang kanyang mga tuta sa burukrasya na sangkot din sa mga kaso ng korapsyon. (Tingnan ang listahan ng korapsyon sa ilalim ng rehimeng Macapagal-Arroyo).



MALALAKING KASO NG KORAPSYON SA ILALIM NG REHIMENG MACAPAGAL- ARROYO

- ₱ Pakikialam ni Mike Arroyo, asawa ng presidente, sa mga pondo ng *Philippine Amusement and Gaming Corporation* (PAGCOR) at *Philippine Charity Sweepstakes Office* (PCSO) at paggamit ng milyun-milyon mula sa mga ito para tustusan ang gastos sa eleksyon noong Mayo 2001.
- ₱ P1.4 bilyong tinabo ng CODE-NGO, isang NGO na pinamumunuan ng mga nasa gabinete ni Macapagal-Arroyo at mga sosyal-demokrata na malalapit sa kanya. Maanomalyang binigyan ito ng solong prangkisa at malaking komisyon sa pagbebenta ng P10 bilyong *PEACE bonds* (bono).
- ₱ Pag-apruba sa kontrata ng *Industrias Metalurgicas Pescarmona SA* (IMPESA), isang Argentinian independent power producer, para sa rehabilitasyon ng planta ng kuryente sa Caliraya-Botocan-Kalayaan.
- ₱ Paghingi ng kalahati ng sapi ng *Philippine Communications Clearinghouse Inc.* (PCCI) mula sa may-ari nitong si Pacifico Marcelo, kapalit ng pagbawi ng pagdis-apruba (*veto*) ni Macapagal-Arroyo sa prangkisa upang mamonopolisa ng PCCI ang pangangasiwa sa inter-koneksyon ng lahat ng mga kumpanya sa telekomunikasyon, na tinatayang nagkakahalaga ng mahigit P53 bilyon taun-taon.
- ₱ Pakikipag-areglo kay Danding Cojuangco kaugnay ng pondong *coco levy*, mga sapi at kontrol ng gubyerno sa *San Miguel Corporation* (SMC) at iba pang pinuhunan mula sa naturang pondo, kapalit ng pampulitikang suporta at malaking pinansyal na kontribusyon ni Cojuangco para sa kampanya ni Macapagal-Arroyo sa eleksyong 2004.
- ₱ Di pagpapatuloy ng kaso ng gubyerno laban sa paglusot ni Lucio Tan sa dapat na binayaranang buwis, kapalit ang pagbaling ni Tan ng suporta mula kay Estrada tungo kay Macapagal-Arroyo.
- ₱ Pagiging tagapamagitan ni George Baviera, isang taong malapit kay Macapagal-Arroyo at dating Tagapagsalita ng Pangulo na si Rigoberto Tiglao, sa mga negosasyon sa pagbabayad ng ransom ng mga *hostage* ng Abu Sayyaf.
- ₱ Pagtanggap ng mga senador at kongresman maging sa kampo ni Macapagal-Arroyo ng suhol mula sa mga Estrada, kapalit ng pag-endorso nila ng kahilingan ng nakakulong na dating presidente para payagang pumunta sa US upang diumano magpagamot ng tuhod.
- ₱ Paghawak ngayon ng Malakanyang sa aktibong nagpapatuloy na operasyon ng jueteng sa pamamagitan ng mga *jueteng lord* at mga pinuno ng AFP at PNP na malalapit kay Macapagal-Arroyo. Sinibak kumakailan ang pitong matataas na opisyal ng PNP upang mas mapadali ang koleksyon ng kurakot sa jueteng.
- ₱ Kumita si Macapagal-Arroyo sa maanomalyang kontrata ng Philippine International Air Terminal Company (PIATCO) na nagkakahalaga ng \$650 milyong dolyar.

(Halaw sa: *Ang Bayan*, Marso 2002)

Hindi na nalalayo ang tuluyang pagbagsak ng papet at pasistang rehimeng Macapagal-Arroyo. Kahit anupamang pagpapakapapet ang gawin niya upang suportahan ng kanyang imperyalistang amo ang pananatili niya sa pwesto, ang sambayanan pa rin ang magpapasya kung hanggang kailan na lamang siya sa pwesto. At sa itinatakbo ng kasalukuyang sitwasyon, kung saan sinasalubong siya ng papalaking mga protesta saanmang panig ng bansa siya magpunta, tiyak na hindi na siya magtatagal pa sa Malakanyang.

Higit kailanman, napakapaborable ng mga kundisyon para sa lahatang-panig na pagsusulong ng rebolusyonaryong pakikibaka. Lumalawak ang hanay ng mamamayang direktang lumalahok sa armadong paglaban. Hakbang-hakbang nating itinatayo ang mga organo ng kapangyarihang pampolitika sa mga kanayunan hanggang makapag-ipon ng lakas para sa ganap na pagpapabagsak ng buong naghaharing sistema.

Tuligsain at labanan ang walang-kahihiyang pang-aalipusta ni Macapagal-Arroyo sa soberanya ng bansa!

Labanan at palayasin ang mga tropang US!

Pabagsakin ang papet, pasista at kurakot na rehimeng US-Macapagal-Arroyo!

Isulong ang digmang bayan upang tuluyang pabagsakin ang bulok na naghaharing sistema!

S

PABATID SA MAMBABASA

Ang Istop ng *SILYAB* ay bukas sa inyong mga puna at komentaryo para sa pagpapahusay ng paglalathala ng ating rebolusyonaryong pahayagan.

Inaanyayahan din namin kayong magpadala ng mga balita o mga rebolusyonaryong karanasan na maaaring ilathala. Ipasa lamang sa kinauukulang yunit na nakakasaklaw sa inyong erya.

Hindi na
nalalayo ang tuluyang
pagbagsak ng
papet at pasistang
rehimeng
Macapagal-Arroyo.
Kahit anupamang
pagpapakapapet
ang gawin niya...
Sambayanan ang
magpapasya kung
hanggang kailan na
lamang siya sa
Malakanyang.

